

Scuviert un abitât protostoric di plui di dîs etars. I risultâts de prime campagne archeologjiche su lis origjins lontanis de aree aquileiese. Un projet de Universitât dal Friûl e de Sorintendence pai Bens archeologjics dal Fvj.

Aquilee prin di Aquilee

Un abitât protostoric, che al rimonte a 3200-3500 agns indaûr plui o mancul, grant plui di 10 etars, cuntune serie di fogolârs par ativitâts domesticis e artesanâls, al è stât ripuartât ae lûs a Tierç, l di Ca Baredi, de prime campagne di sgjâfs inte aree organizade de Universitât dal Friûl e de Sorintendence pai Bens Archeologjics dal Friûl VJ. La mission archeologjiche e jentre intal prin projet di ricercje su la preistorie e protostorie de aree aquileiese promovût di Ateneu e Sorintendence, cun chê di ricostruî i "paisaços sepulîts" di "chê altre Aquilee", chê prime dal periodi roman e dal patriarcjât.



In sens orâri: Il sît di Ca' Baredi, un archeologic al sgjave ceramiclis di 3500 agns indaûr, archeolics al lavôr, grup di students voluntaris.

L'insediament cjatât fûr a Ca Baredi al è lent di un jet antic de Tor, forsît za in part disseccjât tai temps che e disflorî la vile, inte Ete dal Bronç medie e tarde (XV – XII secul p. di C. plui o mancul). I fogolârs imponents, concentrâts in zonis determinadis, a segnin un implant organizât des ativitâts comunitariis e une specializazion funzional dai spazis. Cun variis tipologjîs e tecnicis costrutivis, i fogolârs a jerin a conduzion domestiche doprâts par fâ di mangjâ, e par lavôrs artesanâi di lavorazion e trasformazion di materiis primis in cjase, tant che la industrie des piels,

dal vues, dal cuar e forsît dal metal. I sistemis di delimitazion des areis di ativitât, cun canaletis e murets, a constituissin altris indizis di une planificazion regolâr dal insediament.

L'abitât ripuartât ae lûs dai archeolics de Universitât dal Friûl al jere part di un grant ambit culturâl che al cjape dentri une serie di insediaments colocâts a distancis regolârs inte aree pericostiere dal Friûl, de zone di Aquilee ae zone di Pordenon. Chestis vilis a jerin ponts impuartants di scambi, in particolâr dal metal, tra lis regjons alpinis orientâls e transalpinis di une bande e la Italie padane

venite di chê altre, che i siei centris a jerin cjapâts dentri inn-tun dai ambits culturâi plui impuartants de Ete dal Bronç talliane, chê des Terramare.

Fin a vuê, la alte antichitât de presince umane inte zone là che e sarès nassude Aquilee e jere suggeride di manufats di ram e bronç di etât protostoriche, chei plui antics a son de etât dal ram (III mileni p. di C. plui o mancul). Cierti cercis limitadis di sgjâf dai ultins decenis dal '900 a vevin segnalât cun di plui la presince di un insediament fûrnî di struturis di len, forsît centât di une palade, intal ambient umit-intôr di chel che in etât ro-

mane al sarès stât il canâl Anfure, intune aree dulà che, fin de preistorie, si incrosavin percors doprâts pal scambi a lunghe distance e si distribuivin materiis primis e prodots finîts.

Lis ricercjîs sul cjamp, puartadis indevant inte proprietât de famee Girardi, a son coordenadis di Elisabetta Borgna, docente di Archeologjie egjee dal dipartiment di Storie e tutele dai bens culturâi dal Ateneu furlan.

«La campagne di sgjâf 2013 – al sotlinee il Sorintendent pai Bens Archeologjics dal Friûl VJ, Luigi Fozzati – al è il prin projet di studi su la preistorie e protostorie de aree aquileie-

se, finalizât ae ricostruzion de dinamiche insediative. In altris peraulis, Aquilee prime di Aquilee. Chê altre Aquilee che e je daûr a vignî sù e sarà cussì ogjet di un program specific di ricercje promovût de Sorintendence e de Universitât dal Friûl».

«Chescj prins sgjâfs – e sclaris la professore Borgna –, puartâts indevant ançje in graciis dal acet de amministrazion comunâl di Tierç, a àn puartât a une grande racuelte di dàts e a une leture significative dal profil dal paisaç antic de zone e a àn permetût di meti a pont de colaborazion tra Sorintendence e Universitât».

«Il gnûf projet di ricercje – e rimarche Marta Novello, funzionarie archeologjiche di zone de Sorintendence – al è di grande impurtance parcè che al permet di slargjâ la ativitât di tutele de Sorintendence intal teritori aquileiês».

Il grup di lavôr che al à partecipât aes ricercjîs al jere componût di dottorants e students de Universitât di Udin e students in specializazion de Scuole interateneu di specializazion in Bens archeologjics (Udin, Trieste, Vignesie). Prime dal sgjâf a jerin stâts une ricognizion archeologjiche di superficie e scandais gjeologjics e carotaments curâts di Alessandro Fontana de Universitât di Padue. Al à colaborât cun di plui il Laboratori di Palinologjie e Paleoarceobotaniche (Silvia Marvelli e Marco Marchesini) dal Centri-agriculture ambient di San Giovanni in Persiceto (Bologne).